

USIM kukuh hubungan dengan

masyarakat Islam Krabi

Oleh Noor Azlina Zainudin
azlina.z@bh.com.my

► Krabi

Universiti Sains Islam Malaysia (USIM) merancang untuk menjalin hubungan lebih erat dengan masyarakat Islam di Krabi, Thailand, selari dengan fokus Pelan Strategik USIM 2013-2025 untuk menjadi universiti rujukan dalam bidang integrasi ilmu naqli dan aqli peringkat serantau menjelang tahun 2016.

Komitmen itu diberikan oleh Naib

Canselor USIM, Prof Datuk Dr Musa Ahmad dalam pertemuan bersama dengan Timbalan Gabenor Wilayah Krabi, Tuan Narong Woonsiew dan Presiden Komuniti Islam Krabi, Asnawee Mukura di Krabi Front Bay Resort, Thailand, baru-baru ini.

Anjur seminar

"Krabi yang mempunyai kira-kira 500,000 penduduk dengan separuh daripadanya beragama Islam membuka peluang kerjasama yang luas untuk USIM bersama-sama masyarakat di sini.

"Kita pernah beberapa kali mengadakan khidmat komuniti antarabangsa yang dinamakan Global Islamic Student Outreach (GISO) di

sini dan mendapat respon baik penduduk," katanya.

Selain khidmat komuniti, beliau berkata, USIM bercadang mengadakan program bertaraf antarabangsa anjuran fakulti dan jabatan seperti seminar, konvensyen dan forum selain meneroka kerjasama akademik bersama dengan institusi pendidikan tinggi tempatan.

Sesi pertemuan dua hala itu diadakan bersempena dengan penganjuran Seminar Sistem Ekonomi Islam (iECONS) kali keenam 2015 anjuran Fakulti Ekonomi dan Muamalat USIM.

Selain delegasi Malaysia, seminar turut disertai 130 peserta dari Jordan, Pakistan, Bangladesh, Indonesia, Brunei dan Thailand.

Prof Musa (dua dari kiri) bersama-sama Narong (tengah) dan Asnawee (empat dari kiri) menyempurnakan majlis perasmian iECONS 2015 di Krabi, baru-baru ini.

